



Sud Bosne i Hercegovine
Sud Bosne i Hecegovine

Broj: S1 3 Iž 043552 22 Iž
Sarajevo, 12.08.2022. godine

Sud Bosne i Hercegovine, u vijeću Apelacionog odjeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Mirka Božovića, kao članova vijeća, odlučujući o žalbi Šefke Sinanagić, ..., Š., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine, u nejavnoj sjednici, održanoj dana 12.08.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što uz prijavu nije dostavljen dokaz o tačnoj adresi u inostranstvu.

Žaliteljica je protiv navedene odluke blagovremeno izjavila žalbu navodeći je njena prijava za glasanje izvan Bosne i Hercegovine odbijena iz razloga što je dokument nečitak. Ističe da je dostavila dokument koji je bio neophodan za registraciju, te da nije njena greška što je isti nečitak. U prilogu žalbe još jednom dostavlja traženi dokument i kopiju pasoša, te moli da joj se omogući glasanje na izborima.

Centralna izborna komisija Bosne i Hercegovine je dostavila ovom sudu odgovor na žalbu u kojem predlaže da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH dostavljene dana 19.07.2022. godine, pravilno uočila da podnositeljica prijave nije dostavila validan dokaz o tačnoj adresi u inostranstvu.

Postupajući na način opisan u prednje utvrđenom činjeničnom stanju, podnositeljica žalbe je postupila suprotno odredbi člana 3.15 stav (1) Izbornog zakona BiH („Službeni glasnik BiH“, broj 23/01 do 51/22), kojom je propisano da državljani BiH koji privremeno žive u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju žaliteljica uz prijavu nije dostavila validan dokaz o tačnoj adresi u inostranstvu, obzirom da je dostavila samo potvrdu o upisu u bazu podataka popisa stanovništva i skeniran pasoš Š. iz kojih se ne može vidjeti adresa prebivališta. Dakle, žaliteljica nije dostavila dokaz koji bi potvrdio da su ispunjeni uslovi da se u smislu člana 3.15 stav 6. Izbornog zakona BiH nađe na izvodu iz Centralnog biračkog spiska za glasanje van BiH.

Takođe, nakon obrade prijave žaliteljica je putem e-maila obaviještena da njena prijava za glasanje izvan BiH sadrži nedostatke. Nevedene nedostatke žaliteljica nije otklonila u predviđenom roku.

Napomene radi, žaliteljici nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Zvezdana Antonović